

Ո Ր Ո Շ ՈՒ Մ N 101/6
/վարչական տույժ նշանակելու մասին/

«17» ապրիլի 2019թ.

ք. Վանաձոր

Հայաստանի Հանրապետության պետական եկամուտների կոմիտեի Արևելյան մաքսատուն-վարչության պետ Գարիկ Դարբինյանս, քննելով Վաչիկ Արիստակեսի Գրիգորյանի /անձն. BA2723955, քաղաքացիություն՝ Հայաստանի Հանրապետության, հասցեն՝ Արարատի մարզ, Մասիս, գ. Այնթափ, 16-րդ փ. Տուն 31/1/ կողմից մաքսային կանոնների խախտման վերաբերյալ գործը,

Պ Ա Ր Զ Ե Ց Ի

ՀՀ քաղաքացի Վաչիկ Արիստակեսի Գրիգորյանի անվամբ 31.12.2018 թվականի թիվ 05100033/311218/0000331068 մաքսային մուտքի օրդերով «Ժամանակավոր ներմուծում» մաքսային ընթացակարգով 90 օր ժամկետով ՀՀ տարածք է ներմուծվել MERCEDES-BENZ C-220 մակնիշի, BL354TH պետհամարանիշի, 2000 թվականի արտադրության տրանսպորտային միջոց: Նշված տրանսպորտային միջոցի ժամանակավոր ներմուծման վերջնաժամկետը սահմանվել է մինչև 31.03.2019 թվականը, սակայն մինչ այդ ժամկետի ավարտը վերոնշյալ տրանսպորտային միջոցը չի արտահանվել ՀՀ տարածքից, որի արդյունքում խախտվել է հետադարձ արտահանման պարտավորությունը:

ՀՀ ՊԵԿ Արևելյան մաքսատուն-վարչության Բազրատաշենի մաքսային կետ-բաժնի մաքսային տեսուչ-իրավաբանի կողմից 05.04.2019 թվականին Վաչիկ Արիստակեսի Գրիգորյանի նկատմամբ կազմվել է մաքսային կանոնների խախտման վերաբերյալ արձանագրություն ՀՀ մաքսային օրենսգրքի 199-րդ հոդվածի 1-ին մասի հատկանիշներով:

Մաքսային կանոնների խախտման վերաբերյալ վարչական վարույթի շրջանակներում հարցում է կատարվել ՀՀ ՊԵԿ Ներքին անվտանգության վարչություն՝ ավտոմեքենայի սահմանահատումների վերաբերյալ տեղեկատվություն ստանալու նպատակով: Պատասխան գրությունից պարզվել է, որ MERCEDES-BENZ C-220 մակնիշի, BL354TH պետհամարանիշի, 2000 թվականի արտադրության տրանսպորտային միջոցը 31.12.2018 թվականին Բազրատաշենի մաքսային կետ-բաժնով ներմուծվել է ՀՀ, սակայն հետագա արտահանման պարտավորությունը չի կատարվել:

Նշանակվել է գործի քննություն 11.04.2019 թվականին ժամը 15:30-ին, վերջինս պատշաճ ծանուցվել և ներկայացել է գործի քննությանը:

Վ.Գրիգորյանը դիմում է ներկայացրել ՀՀ ՊԵԿ Արևելյան մաքսատուն-վարչություն, որով խնդրել է գործի քննությունը հետաձգել, քանի որ ցանկանում է լրացուցիչ ապացույցներ ներկայացնել: Գործի քննությունը հետաձգվում և նշանակվում է 16.04.2018թ. ժամը 16:00-ին, վերջինս ներկայանում և մասնակցում է վարչական վարույթի քննարկմանը:

Գործի քննության շրջանակներում ՀՀ քաղաքացի Վաչիկ Գրիգորյանը ՀՀ ՊԵԿ Արևելյան մաքսատուն-վարչություն է ներկայացնում քաղաքացի մեծահասակների ամբուլատոր քարտից՝ տրված 12.04.2019թ. «Այնթափի ԲԱ» ՀՈԱԿ-ի կողմից, որի համաձայն վերջինիս մոտ ախտորոշվել է սուր տրախեոբրոնխիտ և նշանակվել է ամբուլատոր բուժում 29.03.2019թ.-ից մինչև 04.04.2019թ.:

16.04.2019թ. թիվ Ե/22-4/12675-2019 գրությամբ հարցում է կատարվել «Այնթափի ԲԱ» ՀՈԱԿ, որով խնդրել ենք հայտնել արդյոք Վաչիկ Գրիգորյանի նկատմամբ տրված ախտորոշումով վերջինիս հակացուցված է եղել ակտիվ գործողություններ կատարելը՝ մեքենա վարելը:

Գործի քննությունը տեղափոխվում և նշանակվում է 17.01.2019 թվականին ժամը 16:00-ին, քանի որ հարցման պատասխանը դեռևս ստացված չի:

Պատասխան գրությամբ հայտնել են, որ Վաչիկ Գրիգորյանը 29.03.2019թ. մինչև 04.04.2019թ. բուժվել է տնային պայմաններում: Քանի որ նա ունեցել է բարձր ջերմություն, մարմնի ջարդվածություն, ուստի չէր կարող երկար ճանապարհ գնալ, մեքենա վարել:

Տրանսպորտային միջոցի մաքսային արժեքն՝ ըստ մաքսային մուտքի օրդերի կազմում է 1257750 ՀՀ դրամ, որի «Բաց թողնում՝ ներքին սպառման համար» մաքսային ընթացակարգով հայտարարագրման դեպքում կառաջանան մաքսային վճարներ 654030 ՀՀ դրամի չափով:

ՀՀ մաքսային օրենսգրքի 189-րդ հոդվածի 1-ին մասի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունն, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով

տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն:

Նույն հոդվածի 2-րդ մասի համաձայն՝ Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 199-րդ հոդվածի 1-ին մասի համաձայն՝ հետագա արտահանման պարտավորությամբ Հայաստանի Հանրապետություն ներմուծված ապրանքները և տրանսպորտային միջոցները սահմանված ժամկետում չարտահանելը կամ հետագա ներմուծման պարտավորությամբ արտահանված ապրանքները և տրանսպորտային միջոցները սահմանված ժամկետում Հայաստանի Հանրապետություն չներմուծելը՝ առաջացնում է տուգանքի նշանակում՝ խախտման օրվա դրությամբ այդ ապրանքների և տրանսպորտային միջոցների համար «ներմուծում՝ ազատ շրջանառության համար» մաքսային ռեժիմով նախատեսված մաքսային վճարների մեծության 50 տոկոսի չափով, բայց ոչ պակաս, քան 50 հազար դրամ:

«Եվրասիական տնտեսական միության մաքսային օրենսգրքի մասին» պայմանագրի 264-րդ հոդվածի 1-ին կետի համաձայն օտարերկրյա ֆիզիկական անձանց կողմից՝ Միության անդամ չհանդիսացող պետությունում գրանցված անձնական օգտագործման տրանսպորտային միջոցների ժամանակավոր ներմուծումը Միության մաքսային տարածք թույլատրվում է ոչ ավելի, քան 1 տարի ժամկետով: Նույն հոդվածի 5-րդ մասի 1-ին պարբերության համաձայն՝ ժամանակավոր ներմուծված անձնական օգտագործման տրանսպորտային միջոցները, մինչև այն ժամկետի լրանալը, որի ընթացքում այդ տրանսպորտային միջոցները կարող են ժամանակավոր գտնվել Միության մաքսային տարածքում, Միության մաքսային տարածքից արտահանման, ազատ շրջանառության համար բացթողման կամ սույն հոդվածին համապատասխան այլ նպատակներով ենթակա են մաքսային հայտարարագրման:

Այսպիսով վարչական մարմինը քննելով գործում առկա ապացույցները գտնում է, որ Վաչիկ Գրիգորյանի կողմից ներկայացված տեղեկանքում նշված հիվանդության պարագայում վերջինս կարող էր այցելել ՀՀ ՊԵԿ ժամկետի երկարաձգման խնդրանքով:

Վերջինս ցուցաբերել է անգործություն և չի օգտվել օրենքով իրեն վերապահված արտոնությունից և տրանսպորտային միջոցը սահմանաված ժամկետում չի արտահանել ՀՀ տարածքից, չի դիմել մաքսային մարմիններին ժամանակավոր ներմուծման ժամկետը երկարաձգելու խնդրանքով և չի ձևակերպել «Մաքսային պահեստ» մաքսային ընթացակարգով, ինչով պայմանավորված թույլ է տվել ՀՀ մաքսային օրենսգրքի 199-րդ հոդվածով նախատեսված մաքսային կանոնների խախտման հատկանիշներ:

Ելնելով վերոգրյալից և ղեկավարվելով ՀՀ մաքսային օրենսգրքի 221 հոդվածով և Վարչական իրավախախտումների վերաբերյալ ՀՀ օրենսգրքի 214-րդ, 234-րդ հոդվածներով՝

Ո Ր Ո Շ Ե Ց Ի

1. ՀՀ մաքսային օրենսգրքի 199-րդ հոդվածով նախատեսված մաքսային կանոնների խախտում կատարելու համար Վրաստանի քաղաքացի՝ Վաչիկ Գրիգորյանին ենթարկել վարչական պատասխանատվության՝ տուգանելով 327015 ՀՀ դրամի չափով:
2. Որոշման մասին հայտնել Վաչիկ Գրիգորյանին:
3. Պարզաբանել, որ որոշումը ՀՀ մաքսային օրենսգրքի 222-րդ հոդվածի համաձայն 10-օրյա ժամկետում կարող է բողոքարկվել վերադաս մաքսային մարմին կամ ՀՀ վարչական դատավարության օրենսգրքով սահմանված կարգով՝ վարչական դատարան:

Սույն որոշմամբ նշանակված տուգանքի վճարման հաշվեհամարներն են. 900005024055՝ գումարի 70% և 900233586016՝ գումարի 30% (ՀՀ պետական բյուջե, կենտրոնական գանձապետարան, Արևմտյան մաքսատուն-վարչություն, ԿՈՂ 29):

ԱՐԵՎԵԼՅԱՆ ՄԱՔՍԱՏՈՒՆ-
ՎԱՐՉՈՒԹՅԱՆ ՊԵՏ



Գ. ԴԱՐԲԻՆՅԱՆ